

Sulinermik inuussutissarsiortuunerup qanoq ililluni imminut akilersinnaanerulernissaata qulakkeernissaa pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaq Finn Karlsen, SIUMUT)

Akissuteqaat

(Inuussutissarsiortermit Aatsitassanullu Naalakkersuisoq)

Inatsisartunut ilaasortaq Finn Karlsen oqallississiamik pingaarutilerujussuarmik matumuuna saqqummiussivoq:

Qanoq ililluta Kalaallit Nunaanni imminut akilersinnaasumik akissarsiaqarluni sulisartuunissaq qulakkiissavarput?

Apeqquteqaat aamma imatut nipeqarsinnaavoq; ***imminut akilersinnaasumik akissarsiaqarluni sulisartuussagaanni, akissarsiat qanoq annertutigissappat?***

Imaluunniit; ***imminut akilersinnaasumik aningaasarsiaqarluni sulisoqalissappat pisortat ikiorsiissutaat qanoq annikitsigissappat?***

Inuup kialluunniit suliffeqalernissani imaaluunniit ilinnialernissani toqqarniarlugu aalajangiinissaanut qanoq annertutigisumik pissarsiaqarnissaa aalajangiisuusarpoq. Tassanimi aningaasarsiat kisimik pingaaruteqanngillat, tassami soorlu ineqarnermut tapiissutit, boligsikringit, meeqqerivinniisitsinermit tapiissutit, aningaasatigut ikiorsiissutit, allatigullu pisortanit ikiorsiissutit inuup suliffeqalerneratigut annikillisinneqartarmata, taamaattumillu inuup suliffeqalernissani imminut akilersinnaanersoq nalilersulerpagu tamakkua pinngitsooratik sunniuteqartussaapput.

Pineqartut ataatsimoortikkaanni ajornartorsiutinik pilersitsiviusussat, tamatumunngalu ilutigalugu inatsisitigut assigiinngitsut ikigisassaangitsut ataatsimut allangortussaallutik. Soorlu assersuutigalugu suliffissaqartitsiniarnikkut kiisalu ineqarnermut inatsisit, taakkualu immikkoortillugit suliarineqarsinnaanngillat, tassami taakkunuuna inatsisiliornerit imminnut atuomassuteqaqqissaarmata.

Allatut oqaatigilluaannarlugu pisortaniit ikiorsiissutinik pisartagaqarneq kajunginnannginnerulersinneqarsinnaavoq imaluunniit suliffeqalernissaq imaluunniit ilinniagaqalernissaq pilernarnerulersinneqarsinnaavoq.

Misissueqqissaarnerit tamarmik takutippaat inuussutissarsiutitigut piginnaasanik ilinniarneq suliffeqarluni pitsaasumik inuuneqalernissamut aalaakkaasumik isertitaqarfiusoq inuit namminneerlutik ineriartornissaannik periarfissiisartooq, imminnut aammalu ilaquuttaminnik pilersuinermit pilersitsisarlu inuiaqatigiinnilu inuunermik ingerlatsineranni piviusumik peqataalersitsisartooq.

Inuiaqataannikkut ingerlaqatigiinnermi ajornartorsiutit tamakkorpiaat Naalakkersuisut 2025-p tungaanut pilersaarutaanni qaangerniarneqarnissaat pillugu sammisaqarput. Suliaq tamanna

suliffissaqarniarnikkut attuumassuteqartut kommunillu akornanni oqaloqatigiinneq aqqu-
tugalugu pissapput.

Inuiaqataanikkut ingerlaqatigiinnermi ajornartorsiutit taakkua aaqqiiviginiarnerini sammi-
sassat pingaaruteqartut marluusut sammisassaqqissuupput – tassalu pisortanit ikiorsiissutit
akileraarutillu. Tamatumanili imaaliallaannaq aaqqiisoqarsinnaanngilaq.

Aaqqiiniarnerli ataatsimoortut eqqarsaatigalugit, assigiinngitsorpassuartigullu attuumassu-
teqarfiusut eqqarsaatigalugit, ilaatigut nalinginnaasumik suliffissaqarniarnikkut politikkimut
attuumassuteqarfiginngissoriat ilanngullugit.

Maannakkorpiaq Naalakkersuisut suliffissaqartitsiniarnermi siunnersuisoqatigiinnik piler-
sitsisoqassasoq siunnersuutiginiarpaat, tassani suliffeqarnermut tunngatillugu attuumassu-
teqartut kiisalu kommunit suleqatigalugit suliffissaqartitsiniarnermi aqqissuussinikkut
ajornartorsiutit imaannaanngitsut qaangerniarlugit aaqqiissuteqarnissamut iluarsiiissutissat
pisariaqartinneqartut nassaariniassagatsigit. Siunnersuisoqatigiit suliffissaqartitsiniarnermut
tunngatillugu unamminartut toqqakkat misissuiffigissavaat. Pilersaarutigineqarpoq siunner-
suisoqatigiit ataatsimiinnerminni siullerni ajornartorsiutit unammilligassallu makkua suli-
arissagaat:

Inuusuttut akornanni suliffisaaleqineq.

**Suliffissaaleqisut iliuusissamut pilersaarusiunneqarnissamik aqqu-tissiuunneqarnissa-
millu pisinnaatitaaffeqarnerat.**

Suliar-toqqusaanissamut piareersimasuuneq.

Aaqqiissuussinerup nakkutiginera pitsaanerusoq.

Suliffissaqarneq eqaallisagaq.

Sulisut ilinniagaqarsimanngitsut avataaneersut killilersimaarneqarnissaat

Suliffissarsiuussineq nunamut tamarmut atuuttoq

Naalakkersuisut kissaatigaat nunami maani kikkut tamarmik kajungerisaminnik suliaqassasut
kiisalu sulinerikkut nuannaalertassasut, taamatullu ullaat taamaasa suliaqarnissartik pillugu
qilanaarisagarlutik tanngassimaarutissaqarlutillu makittalissasut. Isumalimmik inuuneqalerlu-
tik.

Ilaqarpugut ikinngutiminnik ilaquuttaminnillu ilaqarnermikkut isumalimmik inuuneqarnermik
misigisartunik, ilaqarpugut sunngiffiminni soqutigisaminni isumalimmik inuuneqarnermik
misigisartunik, ilaqarpugut pinngortitarsuarmiinnerminni isumalimmik inuuneqarnermik
misigisartunik kiisalu ilaqarpugut suliffeqarnermikkut isumalimmik inuuneqarnermik
misigisartunik.

Inatsisartuni Naalakkersuisunilu sulinitinni siunertat ataqqinarnersaasa ilaat tassaasariaqar-
poq innuttaasut isumalimmik inuuneqarnermik misigilernissamut tunngavissaminnik toqqaa-
nissanut periarfissiinissamut sinaakkusiinissaq. Minnerunngitsumillu innuttaasut isumalimmik
inuuneqarnissaminnut siunniussaqaarsimanerminnik angusaqarniarnissaannut periarfissal-
lugit.

Sinaakkuttat taakkua ilaat pissusissamisoortumik tassaasariaqarpoq meerartatta peroriartortertik kiisalu meeqqat atuarianni atuarnertik aqqutigalugit inersimasunngornerminni suliffimmik kissaatigisaminnik toqqaanissaannut periarfissiinissaq.

Taamatut oqaaseqarluta oqalliluarnissassinnik kissaappassi kiisalu suliffissaqarniarnikkut ataatsimoorussamik takorluugaqalernissatsinnik angusaqarnissarput neriutigaarput.